

et altri ratificò esser contento pagarlo in termine di mesi 15 zoè l' amontar di peze 121  $\frac{1}{2}$  carisee, con condition che vegnando da la Porta sue iustification e di la Signoria fosseno azetade, e fato quanto sarà comandato, ben promeseno l' altro zorno davanti il chadì e altri fazendosi notar in sigillo, non volseno fosse notado tal cosa, ma *solum* che'l fusse debitor fra mexi 15, sichè l' è intrigado. Scrive io ho de qui zà più di do mexi li salnitri in uno magazen a marina, et spetandosi nave per cargarli perchè stanno mal, cussì l' armada dil Signor parti da qui a dì 18 dil presente, dicono per Modon, sono galie sotil 12, galiote 4 e fuste 15 avanti il suo partir messe questa terra in gran travaio, perchè tolevano quanti mori et christiani si atrovavano in li bazari e li menavano per forza in le galie, e quelli mori per riscatar se pagavano 9, 8, 10 ducati per uno e li lassava andar, ma quelli non haveano il modo li metevano al remo. Questa terra è in fuga, per zorni 9 non si trovò botege averte, niun pareva per la terra. Nui serasemo li fontegi e patimo di vituarie et *maxime* di pan e convenivemo manzar bozolai biscotadi da marinari, e pur si ne avesse hauti! Partita l' armada tutto tornò al solito senza danno di alcuno nostro; quel di zenoesi fu roto le porte senza farli altro danno. Per li ultimi avisi ho dal Cairo erano specie assai, piper valeva ducati 115, zenzari 47. In questi zorni morite uno moro che li fo trovado miara 800 zenzer che non si sapeva, i quali tutti è capitadi in le man del Mitegani, qual si atrova al presente cantera 2000 zenzari e per sta carovana di la Meca se ne aspetta di altra sorta specie che sarà al Cairo a mezo avosto, poi in ottobre si aspetta la carovana ordinaria del Ziden con specie assai, e per avisi si ha dil zonzer di navilii in quelli lochi e qui in la terra ne son bona summa. Per questo anno non si aspetta nave francese sichè per tutto risorgerà specie assai, voria uno comandamento di la Porta che pasadi li zorni limitadi non sia in libertà a questo iudeo Abraim Castoro di retenute. Qui si atrova uno galion zenoese patron Stefanin Doria fo soracomito di la galia di mesier Andrea e per soi boni meriti li ha fato far questo galion e messo in ordine et va in corso, et al presente si trova in queste aque, il qual ha ruinado in questa Barbaria e Soria do navilii, fin questo zorno ne ha preso 28 con grande haver suso, e in quelli zorni è andato a Baruto et Tripoli e fato rescati per ducati 40 milia e più, per quanto ho inteso da uno moro et da uno zudeo, li quali è sta schiavi sopra il ditto galion e

rescatadi, non fa dispiacer a subditi de venitiani ma ben a ogni sorte de christiani et da nostri tuò pan et polvere di bombarda solamente, et uno nostro navilio raguseo venuto de qui par sora l' isola di Candia trovò il ditto galion e lo lassò andar, nè li tolse altro che pan et a lui dil navilio li lassò *solum* pan per tre zorni, et dice che l' ave bella ventura. Dito navilio è venuto qui a instantia di Zuan Batista di Labia nostro da ben mercadante.

*Di Alexandria, di sier Nadalin Contarini 93 consolo, di 13 Octubrio, ricevute a dì 16 Novembrio.* Scrive haver fatto cargar salnitri casse 125 sopra una nave, et come Malem Abraim Castro zudeo andò al Cayro, qual per le extorsion et altro fato volendo conzar le sue cosse spese in dar manzarie al bassà ducati 2000 al mirigiani ducati 1000 a cinque altri ducati 2000 et fato li conti soi restava debitor dil Gran signor ducati 80 milia venetiani, che dice ducati 120 milia, fece acordo de pagarli, e li ho dato ancora per uno altro anno la doana di questa città, et essendo per partirse a dì 2 septembrio zonse la carovana di la Meca ne la qual vene uno cugnado di Schender Zelibi deferder in Constantinopoli, al qual esso Melen si dolse dil bassà che lo manzava. Hor partito il bassà intese questo e lo fece ritornar, et vene de qui comandamenti li fosse tolto la doana, sichè fin starò consule viveremo in pace per esser privo di questo tristo, qual si tien dil tuto sarà ruinado. Per più comandamenti venuti di la Porta al bassà che le galie sono al Sues siano compite a tempo novo, *unde* il bassà ha mandato maistranze de li a lavorarle ma per esser sta fate con legnami freschi è stato al discoperto li maiori e slargati et rimasti largi 4 dita l' uno di l' altro *unde* bisogna desficarli e acostarli insieme. La caravana di la Meca intrò nel Cairo alli 2 dil passato con specie assai, garofoli, noxe e mazi e altre droge asai, di brieve si aspetta la caravana di Altor. Sono specie assai, zenzari, piper e altro, le qual specie verano de qui e si potrà contratar che prima non si poteva far per le strusie grande feva el ditto Malem Abram Castro. Le nave francese a dì 11 avosto zonse de qui con poca roba, tra la qual casse 26 corali, et voleva contratar a gran precii, mori è stati duri a voler far quello ha fato con nostri, et cussì hanno contratà et partirà questo mexe per andar al suo viazo. Scrive la cosa dil credito di sier Polo Loredan *ut in litteris* et quello ha fato, et il portador di la presente sarà missier Giacomo di Andrea barbier venuto a levar li salnitri et lo lauda assai aversi operato etc.